



ILIDŽA

INFORMATIVNI BILTEN OPĆINE ILIDŽA
Ilidža • Februar 2016 • Broj 146



DAN NEZAVISNOSTI BiH



SVEČANA SJEDNICA OPĆINSKOG VIJEĆA

Svečanom sjednicom Općinskog vijeća obilježen 1. mart Dan nezavisnosti



U povodu 1. marta Dana nezavisnosti BiH u Multimedijalnoj sali održana je svečana sjednica Općinskog vijeća Ilidža. Nosioci najvećih funkcija u Općini Ilidža, načelnik Općine prof. dr. Senaid Memić i predsjedavajući Općinskog vijeća Muhamed Omerović podsjetili su na važnost Dana nezavisnosti BiH koji je vezan za referendumsko opredjeljenje građana i građanki da žive u nezavisnoj i suverenoj državi.

Načelnik Memić čestitajući Dan nezavisnosti posebno se osvrnuo na brojne pokazatelje koji govore da je Općina Ilidža okrenula se razvoju i animiranju investitora, odnosno jačanju općine u privrednom smislu, čime se jača i država BiH.

“Nezavisnost Bosne i Hercegovine koju su građani željeli na referendumu 1992. je samo logični slijed i rezultat onoga što je cijela historija Bosne i Hercegovine iskazala i za što je ZAVNOBIH ostavio bitne političke i ustavno-pravne pretpostavke. Bosna i Hercegovina je proglasila nezavisnosti u svojim historijskim i međunarodno priznatim granicama. Tu svoju nezavisnost krvavo smo platili, dočekavši opsadu, izloženost masovnim i gnusnim ratnim zločinima, zločinima protiv čovječnosti, kao i samom genocidu. Autori projekta velike Srbije imali su namjeru da unište Bošnjake, ali i jedinstvenu multietničku kulturu izgrađenu kroz hiljadu godina historije. Ovdje se dostojanstveno poštovalo, povjerenje gradilo, suživot izgradio i tako će biti i ubuduće, poručujem svima koji žele da unište BiH. Nećete to moći jer dolaze nove generacije, naša budućnost naša mladost koja ima snagu i pamet da nastavi i napravi državu koju svi želimo” rekao je, između ostalog, u svom obraćanju načelnik Memić.

Muhamed Omerović, predsjedavajući Općinskog vijeća Ilidža istakao je da je Dan nezavisnosti veliki historijski dan koji će označiti da BiH prvi put izlazi iz polukolonijalnog položaja.

“BiH izlazi na svoj put, put slobode i dostojanstva i to nije direktan put koji vodi u blagostanje. Taj put koji vodi do blagostanja je prilično dalek ali svi narodi su zaslužili slobodu i dostojanstvo pa tek onda blagostanje. Ovaj dan, ovaj praznik je naša sudbina. BiH i njen narod prošli su kroz teško razdoblje, patnje i stradanja i danas vrlo teško ali ipak

korača ka blagostanju i to je zapravo jedini mogući put” rekao je Omerović, te dodao da je zadatak svih da očuvaju dostojanstvo bosanskog vojnika i slijede put onih koji su najvećom cijenom platili. “Naš cilj je Bosna i Hercegovina, zemlja slobodnih ljudi, država u kojoj će se poštovati svaki čovjek i njegova prava. U tom smislu, neka nas današnji dan podsjeti na sve utemeljitelje slobodne i nezavisne BiH i branitelje njene opstojnosti” istaknuo je Omerović.

Gost prof. dr. Smail Čekić u svom historijskom času, podcrtao je važnost ovog datuma za državu BiH.

“Srpski nacionalizam se, u skladu sa svojom generalnom koncepcijom, okrenuo nacističkom konceptu-Velike Srbije, teritorijalnoj ekspanziji-osvajanju životnog prostora, odnosno zaokruživanju “srpskih zemalja” i realizaciji velikosrpske genocidne ideologije, politike i prakse “svi Srbi u jednoj državi “. Srpska politika se odlučila da sprovede svoj program “državi svih Srba”po svaku cijenu, pa i oružjem. To je značilo usmjeravanje na fašizaciju i komadanje Jugoslavije, kao i nasilno mijenjanje republičkih granica. Preduzet je čitav niz aktivnosti i postupaka u cilju rušenja legalnog poretka u Bosni i Hercegovini i planiranja i pripremanja genocida nad Bošnjacima, o čemu postoje brojni dokazi. Bosna i Hercegovina nije bila spremna za odbranu. Odbrambeni rat je vođen prvenstveno vlastitim snagama i sredstvima i u uslovima koji su se graničili sa nemogućim. Evropska zajednica, Ujedinjene nacije i međunarodna zajednica iako su prihvatili rezultate referenduma za suverenu i nezavisnu BiH i međunarodno je priznali, nažalost nisu zaštitili svoju članicu, žrtvu oružane agresije i genocida. Ipak, Bosna i Hercegovina je opstala zahvaljujući hrabrom otporu njenih antifašista branilaca, vođenom na temelju stečenog suvereniteta i nezavisnosti 1992. i opstat će “zaključio je profesor Čekić.

Prigodan program izveli su učenici osnovnih i srednjih škola sa područja općine Ilidža.

Prije održavanja svečane sjednice delegacija Općine Ilidža predvođena načelnikom prof. dr. Senaidom Memićem položila je cvijeće na centralno spomen obilježje šehidima i poginulim borcima.


REDOVNA SJEDNICA OPĆINSKOG VIJEĆA


Donesena Odluka o osnivanju, upravljanju, raspolaganju i korištenju stambenog fonda

Općinsko vijeće Ilidža donijelo je Odluku o osnivanju, upravljanju, raspolaganju i korištenju stambenog fonda uz primjenu principa socijalnog stanovanja, kojom se utvrđuju principi osnivanja i raspolaganja stambenim fondom na području općine Ilidža. Primjenom principa socijalnog stanovanja, osigurava se stambeno zbrinjavanje lica koja nisu u mogućnosti riješiti svoje stambeno pitanje po tržišnim uslovima, uređuju pitanja upravljanja, raspolaganja i korištenja tog stambenog fonda, te uslovi i način ostvarivanja prava na socijalno stambeno zbrinjavanje. Stambeno zbrinjavanje, u skladu sa ovom Odlukom, vrši se primjenom jednog od slijedećih modela: dodjelom stambene jedinice u zakup na neodređeno vrijeme, dodjelom stambene jedinice u zakup na određeno vrijeme, te dodjelom stambene jedinice u zakup u institucijama socijalne zaštite. Postupak za dodjelu stambene jedinice pokreće nadležni organ lokalne uprave/Načelnik u saradnji sa Službom za rad, socijalna pitanja, zdravstvo izbjeglice i raseljena lica, objavljivan-

jem javnog poziva ili na drugi način definisan odlukama o implementaciji specifičnih projekata. Za korištenje stambene jedinice iz ugovora o zakupu, utvrđuje se i plaća zakupnina. Zakupnina se formira na osnovu argumentirano procijenjenih troškova za pojedine dijelove zakupnine u svrhu neprofitnog održavanja i upravljanja namjenskim stambenim fondom. Visinu zakupnina u zavisnosti od tipa stambene jedinice, zone stanovanja i eventualno korištenje koeficijenta pogodnosti stanovanja utvrđuje Općinsko vijeće na prijedlog načelnika u skladu sa važećim propisima i vodeći računa o svrsi svakog specifičnog projekta.

Stipendija Arminu Gabeli

Općinsko vijeće prihvatilo je zaključak za dopunu Odluke o stipendiranju djece bez oba roditelja i djece bez roditeljskog staranja u školskoj 2015/2016. Tim zaključkom dodjeljena je stipendija Arminu Gabeli iz Ilidže, bez oba roditelja, studentu Fakulteta političkih nauka. Općinsko vijeće Ilidža saglasno je da se izvrši ova dopuna spiska Odluke o stipendiranju djece bez oba roditelja.

Zlatna plaketa Adnanu Haskoviću i Enesu Hajdareviću

Zlatna plaketa Općine Ilidža ove godine ide u ruke Adnanu Haskoviću i Enesu Hajdareviću. Adnan Hasković dobio je priznanje kao Ilidžanac, sada uspješan holivudski glumac, koji je dao doprinos u promociji dramske umjetnosti. Enes Hajdarević za doprinos razvoju lokalne zajednice i poboljšanju uslova života građana, te učešću u društveno-korisnim projektima.

Srebrna plaketa dodjeljena je posthumno Aidi Lušničkić i Sefedinu Buliću, kolektivna Mladima Crvenog križa Općine Ilidža i Čolaktex d.o.o Sarajevo. To je odlučilo Općinsko vijeće Ilidža na sjednici 25. februara 2016. godine. Zahvalnice Općine Ilidža dobit će Poliko d.o.o Sarajevo, Hamdija Šetić, Čamil Efendić - posthumno, Semir Lendo, Edin Sinanović i Ivica Buzuk. Dobitnicima Zlatne plakete dodjeljuje se novčana nagrada u iznosu 1.000 KM, a dobitnicima Srebrene plakete 500 KM. Priznanja će biti dodjeljena 12. marta na Dan Općine.



Izvještaj o radu i Program rada Pravobranilaštva Općine Ilidža

Vijeće je usvojilo Izvještaj o radu za 2015. godinu i Program rada za 2016. godinu Pravobranilaštva Općine Ilidža. U izvještajnom periodu Pravobranilaštvo je obavljalo poslove iz nadležnosti koje su utvrđene Zakonom i Odlukom o pravobranilaštvu kao i drugim zakonima u zastupanju u postupcima pravne zaštite imovine i imovinskih interesa pred sudovima u sudskim postupcima, organima uprave i u upravnim sporovima, davalo mišljenja vezano za dodjelu gradskog građevinskog zemljišta, potvrđivanje ugovora o kupoprodaji stanova na koje postoji stanarsko pravo, kao i u drugim predmetima u kojima je nadležno pravobranilaštvo za odlučivanje. U toku 2015. godine povećan je broj predmeta po osnovu podnesenih tužbi u kojima je Općina tužitelj izvršenja po aktima izdatih od nadležnih općinskih službi, pa je Pravobranilaštvo ostvarilo kontakte i sa građanima i sa pravnim licima u cilju lakše i efikasnije naplate potraživanja. U programu rada za 2016. godinu Pravobranilaštvo će kontinuirano raditi na efikasnoj zaštiti imovine i imovinskih interesa Općine, te kroz saradnju sa drugim nadležnim organima i institucijama ubrzati realizaciju svih pokrenutih predmeta. U narednom periodu aktivnosti Pravobranilaštva Općine Ilidža biće usmjerene na poduzimanje mjera radi pravne zaštite imovine i imovinskih interesa Općine, afirmisanju svih vidova preventivne djelatnosti, kontinuirano praćenje pojava i problema vezanih za primjenu zakona u praksi i organizovanju radnih dogovora sa općinama i drugim organima radi postizanja boljih rezultata u zaštiti imovine Općine. Pored navedenog obavljat će i druge poslove koji su u nadležnosti Pravobranilaštva.

Informacije

Na sjednici Vijeća bila je i Informacija o rješavanju zahtjeva na osnovu Odluke o legalizaciji građevina izgrađenih bez odobrenja za građenje i građevina privremenog karaktera koju je Vijeće primilo k znanju. U Informaciji je konstatovano da je od 31. 12. 2008. godine do 31. 01. 2016. godine podneseno 12.259 zahtjeva za izdavanje naknadne urbanističke saglasnosti. Do sada je pozitivno riješeno 4.602 zahtjeva, negativno 3.257 i 4.400 neriješenih zahtjeva. Vijeće je na sjednici primilo k znanju i Informaciju o korištenju prostorija mjesnih zajednica na području općine Ilidža za 2015. godinu. Kako je navedeno u informaciji prostorije mjesnih zajednica korištene su na način i u skladu sa Odlukom Općinskog vijeća o dodjeli u zakup poslovnih zgrada i poslovnih prostorija na kojima pravo raspolaganja ima Općina Ilidža i Odluke o uslovima i načinu korištenja prostorija mjesnih zajednica na području općine Ilidža.

Izvještaj o radu rada Jedinственog općinskog organa uprave, stručnih i posebnih službi

Općinsko vijeće usvojilo je Izvještaj o radu za 2015. godinu Jedinственog općinskog organa uprave, stručnih i posebnih službi i Izvještaj o upravnom rješavanju upravnih stvari u upravnom postupku za 2015. godinu. U izvještaju o radu istaknuto je da su aktivnosti općinskih organa bile usmjerene na realizaciju utvrđenih obaveza, zaključaka Vijeće i obavljanju drugih poslova koji su zakonom ili na drugi način stavljeni u njihovu nadležnost. Poslovi kantonalne uprave koji su zakonom preneseni na Općinskog načelnika i poslovi lokalne samouprave, iz samoupravnog djelokruga općine, obavljaju se u službama za upravu. Stručni i tehnički poslovi za potrebe Općinskog vijeća i načelnika obavljaju se u stručnim i posebnim službama. Organi uprave su u svim oblastima kontinuirano radili na sprovođenju utvrđene politike i neposrednom izvršavanju zakona, podzakonskih akata, drugih propisa i općih akata, rješavali u upravnim stvarima, vodili propisane evidencije i izdavali isprave, pružali pravnu pomoć u ostvarivanju i zaštiti prava građana, te obavljali druge stručne i upravne radnje. Posebna pažnja posvećena je razvojnim projektima, stvaranju uslova za otvaranje novih i dovršenje započetih projekata, kroz stalno praćenje stanja u pojedinim oblastima. Aktivnosti službi odvijale su se u skladu sa ISO 14001:2004, u okviru čega su provođeni interni i eksterni auditi za preispitivanje provođenja ISO standarda. U protekloj godini, na osnovu izvještaja konstatovano je da su i pored teškoća u izvršavanju programskih zadataka ostvareni značajni rezultati u svim oblastima, te da su poduzete sve mjere u cilju što bržeg, efikasnijeg i kvalitetnijeg pružanja usluga građanima. Implementacijom integrisanog sistema upravljanja i projektom poboljšanja poslovnog okruženja u Općini Ilidža unaprijedit će se kvalitet pružanja usluga općinske administracije i uticati na veći nivo svijesti uposlenika i građana.





Tematska sjednica Općinskog vijeća

“Detekcija uzroka blokade procesa usvajanja Odluke o zaštiti izvorišta vode za piće „Sarajevsko polje“ sa ciljem podrške za iznalaženje modela izlaska iz nastale situacije” bila je jedina tačka dnevnog reda druge tematske sjednice Općinskog vijeća Ilidža koja je održana 18. februara 2016.godine u Multifunkcionalnoj sali Općine Ilidža.

Osim važnosti zaštite vode naglašen je i problem imovinsko-pravnih odnosa vlasnika zemljišta u vodzaštitnoj zoni koji godinama ne mogu koristiti svoja imanja, a niko ništa ne poduzima da se oni makar adekvatno obeštete. Midhat Karić jedan je od vlasnika 10.000 kvadratnih metara zemljišta kojim ne može da raspolaže.

“Najveći problem je što nam ne dozvoljavaju da koristimo tu zemlju, da na njoj sijemo, a s druge strane niko neće da je otkupi. Mi smo faktički zarobljeni sa ovom zemljom. Ovaj problem traje više od 50 godina i pogađa 10.000 ljudi u Hrasnici, Sokolović-Koloniji i Butmiru. Želimo da se ovo pitanje jednom riješi na način da ova vodozaštitna zona bude treća ili četvrta da se na njoj može graditi ili da KS insitucije koje su zadužene za ovaj program isplate ljudima tu zemlju po cijeni koja se dogovori”, kazao je Karić.

Načelnik Općine Ilidža prof. dr. Senaid Memić kazao je da je godinama evidentna nebriga o vodi kao najvažnijem resursu.

“Nema smisla govoriti da mi upravljamo lokalnom zajednicom ako nemamo nikavih ingerencija na polovini prostora koje zauzima općina Ilidža. Oko 3.000 hektara zemljišta u zadnjih 60 godina je zablokirano i stalno se govori o interesima Sarajeva, a ne govori se o zaštiti o prava vlasnika zemljišta, ne govori se o preuzetim obavezama, o sredstvima koja bi se morala izdvojiti kako bi se voda obezbjedila za jedan duži period. Jer, ovo kako se ništa ne radi, dovesti će do toga da ćemo doći u bezizlaznu situaciju. Prva greška koja se može dogoditi jeste da zagađimo vodu do 70 metara dubine. Osim toga, velikom broju građana oduzimaju se prava raspolaganja vlastitom imovinom, a niko ništa ne poduzima da se ti ljudi adekvatno obeštete”, naglasio je Memić.



Općinsko vijeće Općine Ilidža zbog izuzetnog značaja projekta zaštite izvorišta vode za piće zahtjeva da se pod hitno formira radna grupa od predstavnika Vlade Kantona Sarajevo i Općine Ilidža koja ima zadatak da Vladi Kantona Sarajevo i Općini Ilidža u roku od 15 dana dostavi decidno razrađen plan aktivnosti izlaska iz nastale blokade ka nosiocima zadataka i rokovima izvršenja. Vlada Kantona Sarajevo i Općina Ilidža su dužne u roku 15 dana nakon prijema plana dati svoja izjašnjenja. Radna grupa imala bi zadatak pratiti izvršenje plana i najmanje jednom mjesečno izvještavati Vladu Kantona Sarajevu i Općinu Ilidža. Članovi radne grupe u ime Općine Ilidža su dužni kod djelovanja u radu grupe voditi računa o dosljednoj primjeni važeće regulative -zaštiti prostora izvorišta Sarajevsko polje ali istovremeno štiti zakonima utvrđena prava vlasnika nekretnina na ovom lokalitetu. Općinsko vijeće Ilidža i Općinski načelnik će pri određivanju delegata u radnu grupu objezbjediti i prisustvo predstavnika građana putem Udruženja građana “Vrelo Bosne”. Općinsko vijeće zahtjeva od nadležnih kantonalnih organa da eventualno pokrenute aktivnosti u cilju izlaska iz blokade projekta trenutno blokiraju radi usaglašavanja sa radnom grupom.

Općinsko vijeće predlaže Skupštini Kantona Sarajeva da daju doprinos ubrzanju postupka donošenja prostorne planske dokumentacije.





Načelnik Memić: Općina Ilidža je poželjna destinacija za sve investitore

Delegacija Općine Ilidža predvođena načelnikom prof. dr. Senaidom Memićem 19. februara obišla je firmu Compact invest d.o.o. Sa vlasnikom firme, generalnim direktorom Compact invest d.o.o koja gradi Sarajevo Waves na Ilidži, Sultan Alkhannahom razgovarao je o trenutnim aktivnostima i planovima ove firme u budućnosti.

Memić je tom prilikom istaknuo da je ovaj reprezentativni objekat kakav je Sarajevo Waves primjer kako se treba raditi ubuduće. Naveo je da Ilidža ima ogroman potencijal za investicije te da će raditi na tome da ovo područje budu poželjna destinacija za ulagače.

“U naselju Otes završena je izgradnja prve zgrade luksuznog naselja Sarajevo Waves koje bi trebalo dati potpuno novi izgled ovom dijelu grada. Radi se o stambeno-poslovnom kompleksu koji nudi novi kvalitet života “u prekrasnom prirodnom okruženju”. Sastojat će se od pet



stambenih blokova, odnosno trinaest objekata koji ima ugodne, svijetle i prozirne apartmane prilagođene datoj funkciji stanovanja. Stanovi imaju velike terase sa kojih se pruža pogled na rijeku Željeznicu i olimpijske planine Igman i Bjelašnicu, te jedinstvene prirodne resurse koji okružuju kompleks” kazao je Sultan Alkhannah, generalni direktor.

“Ova posjeta je prilika da se vidi šta se može i kako napraviti u BiH. Reprezentativan objekat koji je napravljen ne odudara od evropskih i svjetskih građevina. Ovakvi objekti daju Ilidži novi izgled i ljepotu. Mi smo otvoreni za sve investitore koji su dobrodošli i želimo i dalje da budemo poželjna destinacija” izjavio je načelnik Memić.

Stanovi će biti izvedeni u kvadraturi od 60 do 100 kvadratnih metara zajedno sa terasama.

Vlasnici apartmana će imati pristup ozelenjenim prostranim krovovima idealnim za odmor i relaksaciju, sa zavidnim pogledom na prirodno okruženje.

Bit će osigurana parking mjesta za buduće stanare u prostoru suterena objekata, koji će ujedno biti i pod videonadzorom. Investitor je Compact Invest d.o.o., a izvođač Butmir d.o.o.

Vrijednost investicije je 50 miliona KM, dok cijena investicije za prvi objekat zajedno sa infrastrukturom i vanjskim uređenjem iznosi blizu 10 miliona KM.



“Aleja” obilježila Dan nezavisnosti

Ekološko udruženje “Aleja” obilježilo je 1. mart Dan nezavisnosti Bosne i Hercegovine.

Uz prigodan program i druženje članovi ovog udruženja prisjetili su se vremena kada je održan referendum, na kojem su građani svojim glasanjem potvrdili nezavisnost Bosne i Hercegovine.

Ekološko udruženje “Aleja” u svom programu aktivnosti za 2016. godinu ima u planu obilježavanje datuma od državnog značaja, te će iste nastaviti obilježavati i u narednim godinama.





Otvoren Pneumoftziološki dispanzer u Domu zdravlja Ilidža

Premijer Kantona Sarajevo Elmedin Konaković, direktor JU Dom zdravlja Kantona Sarajevo Milan Mioković, ministrica zdravstva u Vladi KS Zilha Ademaj i načelnik Općine Ilidža prof. dr. Senaid Memić presjecanjem vrpce 22. februara 2016. otvorili su Pneumoftziološki dispanzer u Doma zdravlja Ilidža.

Pneumoftziološki dispanzer urađen je po evropskim standardima, veličine je 500 kvadratnih metara i pružat će usluge za oko 90 hiljada stanovnika općine Ilidža. Adaptaciju i rekonstrukciju Pneumoftziološkog dispanzera u cjelosti je finansirala Općina Ilidža.



Prvi čovjek JU Doma zdravlja Kantona Sarajevo Milan Mioković istakao je zahvalnost Općini Ilidža i načelniku Memiću na razumijevanju za realizaciju ovog projekta.

“Centar je moderno opremljen, ima oko 500 kvadrata i ima savremen rengen aparat. Ukupno je u ovaj projekat uloženo 435.000 KM. Za rekonstrukciju, odnosno adaptaciju uloženo je 282.000KM, od kojih je najveći dio donirala Općina Ilidža, a naša ustanova je izdvojila 80.000KM za nabavku RTG aparata i Zavod za zdravstveno osiguranje 14.000 KM. Ovo je veliko postignuće, korisnicima želim bolje usluge, a uposlenicima uspješan rad” izjavio je direktor JU” Dom zdravlja Kantona Sarajevo” Milan Mioković.

Direktorica Doma zdravlja Ilidža Džana Šaćić rekla je da je otvaranje novog prostora potvrda dobre saradnje Općine Ilidža i i Doma zdravlja.

“U konačnici ovakve zajedničke saradnje imamo samo jedan zajednički cilj, a to je unaprijediti rad primarne zdravstvene zaštite, počevši od lokalne zajednice. Kao rezultat svega jeste da mi ustupamo korisnicima naših usluga kao i zdravstvenim profesionalcima ambijent kakav zaslužuju” istakla je Džana Šaćić, direktorica OJ Dom zdravlja Ilidža.

Načelnik Općine Ilidža prof. dr. Senaid Memić iskazao je zadovoljstvo urađenim projektom.

“Drago mi je da imamo svi zajednički interes. Nevažno je ko je koliko učinio, a važno je da će ovo biti razlog da zdravstvo pomaknemo u pravom smjeru. Kupujući najbolje aparate možemo doći do jeftinog zdravstva. Općina Ilidža je u ovaj Dom zdravlja od 2011. uložila 560.000 KM. Nadam se da ćemo do iduće godine uložiti još više, i da će biti milion” dodao je načelnik Memić.

Zilha Ademaj ministrica zdravstva smatra da je otvaranje centra, značajno za zdravstvo Kantona u cjelini jer će pacijenti imati bolje uslove za liječenje, odnosno bolju zdravstvenu zaštitu.

Premijer Konaković rekao je da je ovo dobar primjer saradnje lokalne zajednice sa javnim ustanovama i potvrda da se dobrom saradnjom može mnogo postići, saradnjom koja će se nastaviti i u budućnosti.



Otvoren vrtić “Lužani”

Premijer Kantona Sarajevo Elmedin Konaković, ministar obrazovanja Kantona Sarajevo Elvir Kazazović i načelnik Općine Ilidža prof. dr. Senaid Memić presjecanjem vrpce svečano su 19. februara otvorili obnovljen vrtić “Lužani”. Ovom prilikom su mališani ovog, a i ostalih vrtića, uz pomoć hora Dječijeg doma „Bjelave“, pripremili i izveli bogat svečani kulturno-zabavni program sa mnoštvom interesantnih muzičkih i recitatorskih nastupa.

“Općina Ilidža kontinuirano brine o predškolskom odgoju iako nema nadležnosti i za ovo obdanište osim što smo izdvojili značajna sredstva u iznosu 100.000 KM, planirana su i sredstva za izgradnju ograde oko objekta. Djeci želim puno sretnih trenutaka u ovoj ustanovi i da budu uzorni građani općine Ilidža. Na sanaciji ovog dijela objekta nećemo se zaustaviti, jer je ovo prvi objekt ove vrste na Ilidži”, rekao je Memić i najavio konkretna sredstva od oko 60.000 KM novih ulaganja u ovaj vrtić, kao i u vrtić u Hrasnici.

“Otvaranje ovog vrtića s pravom mogu svrstati među najljepše trenutke ovih sedam mjeseci mog rada. Gledajući iz ugla rukovodioca, novi vrtić ne predstavlja samo novu, lijepu zgradu, nego mnogo više od toga. Treba posjetiti da je predškolski odgoj i obrazovanje dio sistema o kojem odlučuju Kanton kao osnivači i lokalna zajednica, pa je s toga svaki adaptirani objekt za potrebe predškolske djelatnosti i potvrda istinske brige za djecu predškolskog uzrasta. To što smo otvorili ovako značajan objekt za potrebe djece predškolske dobi, zasluga je Vlade Kantona Sarajevo, Federalnog ministarstva obrazovanja i Općine Ilidža, koji razumiju i uvažavaju potrebe svojih građana, a time svakako doprinose i stvaraju kvalitetnije uslove za smještaj i boravak djece u predškolskoj ustanovi” rekla je v.d. direktorica JU “Djeca Sarajeva Jasmina Čongo. Ministar Kazazović je iskazao zadovoljstvo otvaranjem ovog vrtića naglašavajući namjeru Vlade da poveća broj vrtića u Kantonu. Premijer Konaković je podsjetio da je mandat ove Vlade započeo sa najtežom situacijom trovanja djece hranom u ovoj javnoj ustanovi, te da se danas ne može reći da su upotpunosti zadovoljni, jer smatra da se uvijek može još bolje. Zahvalio se svojim prethodnicima, jer su oni započeli i dobrim dijelom uticali na rekonstrukciju ovog vrtića.

Inače, inicijativa za sanaciju ovog vrtića konkretnim potezima započela je još 2008. godine, kada je Općina Ilidža uplatila sredstva u iznosu od 100.000 KM Javnoj ustanovi „Djeca Sarajeva“ za izradu projektne dokumentacije i djelimičnu sanaciju objekta. Sredstva za njegovu rekonstrukciju osigurali su Ministarstvo za obrazovanje, nauku i mlade KS sa 115.000 KM, Federalno ministarstvo obrazovanja i nauke sa 68.700 KM te JU „Djeca Sarajevo“ sa 62.166,50 KM, što je ukupni iznos od 345.866,50 KM. U okviru sanacije izvedeni su radovi na izgradnji viševodne krovne konstrukcije, postavljanju pokrova od lima, sanaciji oštećenja betonskih ploča, zatvaranju vanjskih fasadnih otvora te funkcionalno osposobljavanje prostora od 307 m² za dvije odgojne grupe i smještaj oko 50 djece.

U vrtiću će biti angažirana četiri odgajatelja, jedna spremačica i jedna servirka. Inače, ukupna površina korisnog prostora u ovom vrtiću je 1.072 m² i ima kapacitet smještaja za 180 djece.



Prijem za najstarije Ilidžance

Načelnik Općine Ilidža prof. dr. Senaid Memić i predsjedavajući Općinskog vijeća Muhamed Omerović upriličili su 12. februara prijem za 25 Ilidžanaca, najstarijih stanovnika sa područja ove općine. Tom prilikom uručili su im novčane poklone u iznosu od 50 KM.

“Ovim prijemom želimo reći da naši najstariji građani nisu, niti smiju biti zaboravljeni. Ovo je samo mali gest kojim želimo da unesemo toplinu i radost u vaše domove, makar jedan dan. Teška su vremena, ali mi još uvijek računamo na vas da nas posavjetujete, naučite kako da budemo bolji, složniji. Želja nam je da svakodnevno budemo vaš servis i uvijek smo tu za vas. Želimo vam svako dobro i mnogo zdravlja i da još dugo nam poživate” kazao je, između ostalog, načelnik Memić.

Nakon toga načelnik Memić je posjetio Starački dom “Miran san” u Otesu i uručio kovertu za 70 štićenika ovog



doma. Tratnik Štefica štićenica ovog doma rođena 1928. godine rekla nam je da je zahvalna načelniku na ukazanoj posjeti i novčanoj pomoći Općine Ilidža, jer nije zaboravljena.

Svih 1.807 stanovnika starijih iznad 80 godina dobit će na adresu po 50 KM.

Nastavak radova saobraćajnice Ilidža- Hrasnica sa tramvajskim pojasom

U 2016. godini jedan od značajnijih projekata Općine Ilidža bit će nastavak izgradnje saobraćajnice Ilidža-Hrasnica sa tramvajskim pojasom. Nastojat će se što prije riješiti imovinsko-pravni odnosi na drugoj raskrsnici u Sokolović-Koloniji sa objektima, kako bi se nastavili radovi na saobraćajnici. Kad vremenski uslovi budu dozvoljavali firma “Bosman” kao izvođač građevinskih radova i firma “Testingelektro” kao izvođač radova na izgradnji javne rasvjete, nastavljaju radove ugovorenih obaveza, asfaltiranje preostalih 240 metara saobraćajnice



(desni kolovoz sa pješačkom stazom). U proteklom periodu je asfaltirana pješačka staza, asfaltiran je kolovoz u dva sloja, urađena je i montirana javna rasvjeta u dužini od 450 metara.

U ovoj godini zatvaranje Kolektivnog centra u Hrasnici

U BiH se već godinama implementiraju razni projekti stambenog zbrinjavanja koje, uglavnom, finansiraju međunarodne organizacije sa ili bez sufinansiranja od strane države, entiteta i lokalnih zajednica. Stambene jedinice se obezbijavaju kroz izgradnju novih stambenih objekata na zemljištu koje je osigurala lokalna zajednica ili adaptacijom stambenih jedinica u uništenim ili oštećenim stambenim zgradama.

Općina Ilidža učestvuje u državnim projektima stambenog zbrinjavanja koji se trenutno implementiraju (Regionalni stambeni program, CEB II i drugi.) kao i drugi slični projekti, bez obzira što su namjenjeni različitim kategorijama korisnika i što je različit način finansiranja, kredit, grant, budžetska sredstva. Kolektivni centri u BiH su još uvijek realnost i podsjetnik na bolna ratna dešavanja. U ovoj godini se planira zatvaranje Kolektivnog centra u Hrasnici objekta za privremeni

smještaj raseljenih porodica. Planirana je njegova rekonstrukcija u kojem će 30-tak obnovljenih stambenih jedinice biti dodjeljene korisnicima za koje Kanton Sarajevo plaća najamninu stana. Stanovima će raspolagati Služba za rad, socijalnu politiku, izbjeglice i raseljena lica Kantona Sarajevo. U Kolektivnom centru u Hrasnici trenutno je smješteno 18 porodica.






U toku izgradnja kotlovnice uz objekat Sedme osnovne škole

Još uvijek su u toku radovi na obnovi školske zgrade Sedme osnovne škole. Učenici i nastavnici ove škole su i pored otežanih uslova rada, prije svega materijalnih i prostornih, i do sada ostvarivali dobre rezultate u svim oblicima rada.

Trenutno se izvode radovi izgradnje kotlovnice uz objekat Sedme osnovne škole. Izvođač radova je firma "Unioninvest" d.d. Nadzor vrši Zavod za izgradnju Kantona Sarajevo. Vrijednost radova iznosi 158.413,74 KM, a finansira ih Općina Ilidža. Završetak radova je planiran za dva mjeseca.

Nastava u ovoj školi se odvija u tri smjene od 7.30-18.45. Škola ove godine broji 618 učenika.



Besplatna pravna pomoć za 799 građana

Unadležnosti Službe za opće poslove Općine Ilidža su i poslovi pružanja besplatne pravne pomoći stanovnicima u određenim oblastima, a prema Zakonu o pružanju pravne pomoći. U 2015. godini besplatnu pravnu pomoć zatražilo je 799 građana, od čega 526 za sastavljanje pismenih podnesaka i 273 za usmeni savjet. Pravne pomoći pružane su u oblasti radnih odnosa na sastavljanju tužbi za uplatu doprinosa za penzijsko i invalidsko osiguranje, neisplaćenih plaća, nezakonitog otkaza ugovora o radu i drugih potraživanja iz radno-pravnog odnosa, kao i sastavljanja prijedloga o izvršenju pravosnažnih sudskih presuda. U oblasti boračko-invalidske zaštite pravna pomoć se najčešće odnosila na sastavljanje žalbi na zaključke i rješenja za ostvarivanje prava boraca. Pravna pomoć pružana je i licima u stanju socijalne potrebe radi ostvarivanja prava na ličnu invalidninu, dodatak za njegu i pomoć od drugog lica, dječiji dodatak, te građanima iz oblasti penzijsko-invalidskog osiguranja i oblasti građanskih stanja za pokretanje ostavinske rasprave, dopunskih rješenja o nasljeđivanju, za dokazivanje smrti, prijedlozi za ispravku podataka u zemljišnjim knjigama i drugo.

U januaru i februaru 2016. godine pravnu pomoć za sastavljanje pismenih podnesaka iz raznih oblasti zatražilo je 78 lica i 27 lica za usmeni pravni savjet.

Općina Ilidža Udruženju penzionera godišnje doznačava 43.200 KM

Općina Ilidža kontinuirano doznačava sredstva na račun Udruženja penzionera Ilidža na ime umrli na porodicama.

Tako je u 2015. godini Općina isplatila 43.200 KM. Visina sredstava u mjesečnom iznosu 3.600 KM planirana su i 2016. godine.



Humanitarna izložba ručnih radova

Udruženje „Zlatna ruka“ Ilidža u holu zgrade Općine Ilidža 5. februara 2016. godine organizovalo je izložbu ručnih radova. Vrijedne aktivistice ovog udruženja izložile su ručno tkate bosanske serdžade, ćilime, vez, kožnu galanteriju, pletene odjevne predmete, heklane garniture i slike rađene u aluminijskoj foliji. Izložba je prodajnog karaktera, a prihod od prodaje namjenjen je za posjetu štitičenicima JU Zavod za zbrinjavanje mentalno invalidne djece i omladine Pazarić. Istim povodom i sa istim sadržajem biti će organizovana izložba i u hotelu Hollywood.



Predstavljamo: “BAŠLIJA”

Općina Ilidža, od decembra 2015.g. bogatija je za još jedno novo udruženje, a riječ je o Udruženju za očuvanje tradicije i razvoj kulturno-umjetničkog stvaralaštva “BAŠLIJA”.

Udruženje je nastalo 10. decembra u cilju očuvanja tradicije naroda i narodnosti, prvenstveno Bosne i Hercegovine, ali i drugih kultura, djelujući kroz različite sekcije, projekte, aktivnosti i sadržaje, za sve uzraste i populacije. Misija ovog udruženja je da kroz svoj program, aktivnosti i sekcije, doprinese očuvanju tradicije naroda i narodnosti BiH, kao i drugih kultura, kroz izvornost i autentičnost, umjetnički izražaj i stvaralaštvo, dodajući notu modernog i savremenog doba.

Udruženje je za veoma kratko vrijeme okupilo oko 100 aktivnih članova, koji svoje slobodno vrijeme i znanje nadograđuju i upotpunjavaju kroz: folklornu sekciju, sekciju za izradu tradicionalnih kostima, dramsko-recitatorsku i literarnu sekciju, sekcije za istraživanje i očuvanje tradicijskih vrijednosti i nematerijalne baštine, kao i nekoliko volonterskih timova za realizaciju projektnih i humanitarnih aktivnosti. Svoj rad i program Udruženje “BAŠLIJA” će u povodu nadolazećih “Dana Općine Ilidža 2016” predstaviti javnosti kroz Koncert dječijih folklornih grupa, koji će se održati 19. marta i Večer poezije “Ilidžo, u srcu i stihu te nosim” 27. marta. Ulaz za pomenute svečanosti, bit će slobodan i program će se održati u Multimedijalnom centru Ilidža (bivše kino Igman), saopćio nam je Džemo Hurić, predsjednik udruženja, koji se ovom prilikom i zahvalio općinskom načelniku prof.dr. Senaidu Memiću, i Službi za obrazovanje, kulturu, sport i informisanje.



Besplatan kurs engleskog jezika

Institut za razvoj mladih KULT u saradnji s Općinom Ilidža, organizira besplatan kurs engleskog jezika za početnike/ce. Po završetku kursa i uspješno položenog testa znanja kandidati/kinje će dobiti certifikate.

Kandidati/kinje će nakon popunjavanja prijavnog obrasca polagati test engleskog jezika na osnovu čega će se odrediti njihov stepen znanja.

Kurs će se održavati dva puta sedmično, srijedom i petkom od 12.00 do 13.30. Pravo učešća imaju mladi od 18 do 30 godina, koji se nalaze na području općine Ilidža. Potrebno je pri upisu dostaviti potvrdu iz Zavoda za zapošljavanje, kao dokaz da pripadate toj kategoriji.

Za više informacija kontaktirajte nas telefonski na 033 637290 ili mailom na sunita.koristovic@kultbih.org.

Aktivnost je podržana od strane Općine Ilidža kroz Strategiju prema mladima općine Ilidža.



Zahvalnica načelniku Memiću

Predstavnice Centra za Razvoj Omladinskog Aktivizma CROA uručile su zahvalnicu načelniku Općine Ilidža prof. dr. Seanaidu Memiću za podršku projektu „Volontiranje je cool 2015“. U projektu sa područja općine Ilidža učestvovalo je 60 volontera iz Pete, Četvrtre i Sedme osnovne škole koji su ostvarili 6000 volonterskih sati koje su darovali svojoj zajednici. Projektom su podržane kontinuirane volonterske aktivnosti djece i mladih u zajednici koje doprinosi razvoju građanske odgovornosti i razvoju socijalnih vještina. Općina Ilidža je za realizaciju ovog projekta dodijelila 500 KM. Načelnik se tom prilikom zahvalio na dodijeljenoj zahvalnici i obećao da će i ubuduće podržavati projekte koji su namijenjeni mladim.



Edin Hajdarpašić osvojio bronzu na Evropskom prvenstvu u Kipru

Član Karate kluba "Champion" i reprezentativac Bosne i Hercegovine u karateu u kategoriji kadeta do 52 kg, Eldin Hajdarpašić, osvojio je treće mjesto na Evropskom prvenstvu za kadete, juniore i U21, koje je održano u Limassolu na Kipru.

Ovim rezultatom nastavljen je trend odličnih rezultata takmičara karate kluba "Champion" na zvučnim prvenstvima Evrope i svijeta, a već krajem ovoga mjeseca seniori će nastupiti na Balkanskom prvenstvu za seniore.

"Izuzetno smo sretni, da su naši takmičari nastavili odličan niz rezultata. Od 2006. godine kontinuirano proizvodimo reprezentativce BiH koji osvajaju medalje na evropskim i svjetskim prvenstvima. Eldin Hajdarpašić je mlad takmičar koji obećava da ćemo i u budućnosti moći računati na nove uspjehe", izjavio je Denis Muhović, trener KK "Champion".



Edin Sinanović zlato i Minela Selman srebro donijeli iz Karlovca

Na Evropskom kupu održanom 13. i 14. februara 2016. u Karlovcu takmičari Kick-boxing akademije "Ilidža" osvojili su dvije medalje.

Edin Sinanović osvojio je zlato i Minela Selman srebro. U ovoj teškoj konkurenciji gdje su nastupili takmičari iz 21 zemlje sa više od 1000 takmičara ovo je izuzetan rezultat akademije.

"Ova godina je započeta sa osvajanjem zlatne medalje na Evropskom kupu i potvrda da sam u dobroj formi. Ovo je rezultat koji će mi dati podstrek da budem još bolji i uspješniji, te da budem spreman za svjetsko prvenstvo koje će se održati u septembru u Dablinu u Irskoj" rekao nam je Edin Sinanović.




Sedmi međunarodni Kick boxing kup Ilidža open 2016

U okviru programa obilježavanja Dana Općine Ilidža u organizaciji Kick boxing akademije Ilidža i pod pokroviteljstvom Općine, 27. februara 2016. godine u Javnoj ustanovi Kulturno-sportski i rekreacioni centar Ilidža održan je tradicionalni Sedmi međunarodni Kick boxing kup Ilidža open 2016. Na turniru je učestvovalo 400 boksera iz 60 klubova iz Hrvatske, Srbije, Crne Gore, Slovenije, Makedonije i Bosne i Hercegovine koji su se takmičili u konkurenciji kadeta, juniora i seniora u muškoj i ženskoj konkurenciji u kategorijama point fighting, light contact, kick light, ful contact i low kick. Turnir je otvorio načelnik Općine Ilidža prof. dr. Senaid Memić koji je učesnicima turnira zaželio dobrodošlicu na Ilidžu, lijepo druženje i mnogo uspjeha u takmičenju. Tom prilikom organizator je načelniku Memiću uručio Zlatnu plaketu za doprinos i podršku u organizaciji ovog značajnog takmičenja. U cjelodnevnom programu koji je privukao veliki broj ljubitelja ovog atraktivnog borilačkog sporta, viđeno je dosta interesantnih i atraktivnih mečeva. Takmičari Kick boxing akademije Ilidža osvojili su jednu zlatnu, jednu srebrnu i četiri bronzane medalje.

Predstavnici KSOR Partizan zabilježili dobar rezultat

Klub za sportski odgoj i rekreaciju "Partizan" i novoformirana sekcija TREK team Sarajevo učestvovao je na 16. Splitskom polumaratonu sa svoja dva predstavnika u ženskoj i muškoj kategoriji. Polumaraton je održan 28. februara na kojem je svoje učesće dalo preko 1500 prijavljenih trkača iz 30 zemalja svijeta.

Predstavnici kluba TREK Alen Raonić završio je sa vremenom 1:34:54 a Šejla Sarić 2:29:28. što je veoma dobar uspjeh.



Raspored manifestacija u povodu 12. marta Dana Općine Ilidža

27.02.2016. Godine /SUBOTA

7 INTERNACIONALNI KICK BOXING KUP „ILIDŽA OPEN 2016“
JU KSiRC ILIDŽA, CJELODNEVNI PROGRAM OD 11:00 sati

29.02.2016. Godine/UTORAK

„SVEČANA SJEDNICA POVODOM 1.MARTA DANA NEZAVISNOSTI BIH“
MULTIMEDIJALNI CENTAR ILDŽA U 15:00 sati

5 i 6.03.2016. Godine /SUBOTA I NEDJELJA

„11 OTVORENO PRVENSTVO U KARATEU ZA DJECU, KADETE I JUNIORE - ILIDŽA 2016“
JU KSiRC ILDŽA, CJELODNEVNI PROGRAM OD 10:00 sati (svečano otvaranje u 13:00 sati)

11.03. 2016. Godine/ PETAK

PREDSTAVA „USPAVANA ŠTRECILIJA“
MULTIMEDIJALNI CENTAR ILDŽA U 18:00 sati

11.03.2016. Godine/PETAK

„SVEČANA SJEDNICA POVODOM 12. MARTA DANA OPĆINE ILIDŽA“
MULTIMEDIJALNI CENTAR ILDŽA U 15:00 sati

12.03.2016. Godine /SUBOTA

„KONCERT DUHOVNE MUZIKE“
MULTIMEDIJALNI CENTAR ILDŽA U 19:30 sati

13.03.2016. Godine/NEDJELJA

„DJEČIJA MODNA REVIIJA“
HOTEL HOLLYWOOD-ILIDŽA U 18:00 sati

13.03.2016. Godine/NEDJELJA

„ŠAHOVSKI TURNIR“
RVI BAZEN U 10:00 sati

19.03.2016. Godine/SUBOTA

„TURNIR U BOČANJU“
PIJAČNA 72DO U 11:00 sati

19.03.2016. Godine/SUBOTA

„VEČE DJEČIJIH FOLKLORNIH GRUPA“
MULTIMEDIJALNI CENTAR ILIDŽA U 19:00 sati

23-25.03.2016. Godine

„DANI OTVORENIH VRATA SPOMENIČKOG KOMPLEKSA RATNI TUNEL DB“
Tuneli br.1 (Donji Kotorac),od 9:00-15:30 sati

25.03.2016. Godine / PETAK

„DRAMSKA PREDSTAVA“
DOM KULTURE BUTMIR U 19:00 SATI

26.03.2016. Godine/SUBOTA

„VEČER FOLKLORA“
MULTIMEDIJALNI CENTAR U 19:00 sati

27.03.2016. Godine/NEDJELJA

VEČER POEZIJE „ILIDŽO, U SRCU I STIHU TE NOSIM“
MULTIMEDIJALNI CENTAR ILIDŽA U 18:00 sati

25-27.03.2016. Godine

„4. BASKET KUP ILIDŽA 2016“
JU KSiRC ILIDŽA U 10:00 sati